

MUZIONE
(CÙ DUMANDA D'ESAME PRIURITARIU)

- **DEPOSITATA DA** : VOCE NAZIUNALE, SCELTA PATRIOTTA, CHJAMA À L'UNITÀ, FRONTE POPULARE.
 - **UGHJETTU** : **STATUTU DI RESIDENTE**
-

VISTU a deliberazione N°14/042 di l'Assemblea di Corsica di u 24 d'aprile di u 2014 à prò di a messa in ballu di un statutu di residente per pruteghje u patrimoniu fundariu.

VISTU u bilanciù demugraficu 2024 di a Corsica publicatu da l'INSEE in aprile 2025.

CUNSIDERENDU u blucchime puliticu annant'à a rivendicazione di a messa in ballu di un statutu di residente dapoì 11 anni.

CUNSIDERENDU a lotta contr'à a speculazione immobiliare in Corsica dapoì un mezu seculu purtata principalmente da u Muvimentu Naziunale incù sacrifici.

CUNSIDERENDU a crescita di a popolazione di 32 900 abitanti dapoì 2015 purtendu u totale à 360 200 incù un soldu naturale nascita/morte negativu.

CUNSIDERENDU e conseguenze di a crescita di a popolazione annant'à u prezzu di l'immobiliare. Dapoi 2010, c'hè statu una crescita di 29% per appartamenti è 59% per e case.

CUNSIDERENDU chì a Corsica hè a regione più povera di Francia metropolitana.

CUNSIDERENDU a speculazione immobiliare è fundaria cum'è centrale in i sistemi maffiosi.

VISTU u currieru di u scagnu di i cuntrolli di legalità è bugettariu è l'urbanisazione territoriale di a prifettura di Corsica, adirizzatu à a cumuna di Lugu di Nazza chì dumanda di caccia a deliberazione di u cunsigliu municipale chì face prò à u statutu di residente, minaciendu d'attaccalla davant'à u Tribunale Administrativu.

L'ASSEMBLEA DI A GIUVENTÙ DI A CORSICA

CHJAMA à Cullettività di Corsica à ricunnosce a lotta contr'à a speculazione immobiliare è fundaria cum'è centrale in u cumbattu contr'à i sistemi maffiosi.

ACCERTA chì u statutu di residente hè un arnese ghjuridicu fondamentale per luttà contr'à a speculazione immobiliare è per permette à i Corsi d'alloghjassi in la so terra.

PORGHJE u so sustegnu à e cumune ch'anu pigliatu una deliberazione à prò di u statutu di residente : Alzu, Ambiegna, Cutuli è Curtichjatu, Granace, Lopigna, Lugu di Nazza è Ortu.

CHJAMA l'inseme di e cità è paesi di Corsica à piglià è appiecà una deliberazione à prò di u statutu di residente per participà à stu cumbattu puliticu contr'à a speculazione immobiliare è permette à i Corsi d'alloghjassi in la so terra.

CHJAMA i più alti eletti di a Corsica à sustene u cumbattu puliticu contr'à a speculazione immobiliare.

DUMANDA à u Cunsigliu Esecutivu di Corsica di sustene una nova deliberazione cum'è quessa in l'Assemblea di Corsica per sustene anch'ellu a dimarchja purtata dapoi 11 anni à prò di u statutu di residente.